

**URDHËR**  
**Nr. 230, datë 13.4.2023**

**PËR DISA SHITESA NË URDHRIN NR. 149, DATË 31.3.2022, “PËR MIRATIMIN E  
RREGULLORES PËR ZBATIMIN E LIGJIT NR. 64, DATË 31.5.2012, ‘PËR  
PESHKIMIN’”**

Në mbështetje të pikës 4, të nenit 102 të Kushtetutës dhe të pikës 2, të nenit 135, të ligjit nr. 64, datë 31.5.2012, “Për peshkimin”, të ndryshuar,

**URDHËROJ:**

Në rregulloren “Për zbatimin e ligjit nr. 64, datë 31.5.2012, ‘Për peshkimin’, bashkëlidhur dhe pjesë përbërëse të urdhrit nr. 149/2022”, bëhen këto shtesa:

1. Pas nenit 49, shtohet neni 49/1, me këtë përmbajtje:

“Neni 49/1

**Regjistri i Shkeljeve të Rënda në Peshkim**

1. Sektori i Inspektimit dhe Kontrollit pranë Drejtorisë së Shërbimeve të Peshkimit dhe Akuakulturës krijon dhe plotëson Regjistrin e Shkeljeve të Rënda sipas formatit të përcaktuar në shtojcën 2, të kësaj rregulloreje.

2. Inspektori i peshkimit njofton DSHPA-në, në rrugë elektronike, për të gjitha rastet kur ka pasur shkelje të rënda në peshkim, të cilat janë konstatuar dhe kanë qenë objekt i një inspektimi zyrtar, duke specifikuar natyrën e shkeljeve sipas shtojcës 12, të vendimit nr. 407, datë 8.5.2013, “Për përcaktimin e një regjimi kontrolli për të garantuar respektimin e rregullave të politikave menaxhuese në peshkim”, të ndryshuar, të Këshillit të Ministrave.

3. Raportimi i shkeljeve kryhet duke dhënë detaje të shkeljeve, në përputhje me formatin e përcaktuar në shtojcën 2, si dhe duke përdorur kodet e përcaktuara në shtojcën 3, të kësaj rregulloreje.

4. Në regjister shënohet lloji i procedimit të nisur, vendimin e marrë dhe natyrën e dënimeve të vendosura, në terma specifikë.

5. Sektori i Inspektimit dhe Kontrollit dërgon informacionin e përcaktuar në pikën 3 të këtij neni, pranë Drejtorisë së Politikave dhe Programeve të Peshkimit dhe Akuakulturës, brenda datës 15 të çdo muaji.

6. Sektori i Inspektimit dhe Kontrollit harton raportin vjetor mbi shkeljet e rënda dhe dërgon në Drejtorinë e Politikave dhe Programeve të Peshkimit dhe Akuakulturës brenda datës 31 janar të vitit pasardhës.

7. Raporti vjetor duhet të përmbajë:

a) të gjitha shkeljet e rënda, të përmendura në pikën 3 të këtij neni, të konstatuara gjatë vitit paraardhës;

b) shkeljet e konstatuara, gjatë viteve të tjera, për të cilat është marrë një vendim në vitin paraardhës;

c) tabelën përmbledhëse të pikëve dhe penalteteve për çdo anije”.

3. Pas shtojcës 1, shtohen shtojcat 2 dhe 3, bashkëlidhur këtij urdhri.

4. Ngarkohet Drejtoria e Politikave dhe Programeve të Peshkimit dhe Akuakulturës dhe Drejtoria e Shërbimeve të Peshkimit dhe Akuakulturës për ndjekjen dhe zbatimin e këtij urdhri.

Ky urdhër hyn në fuqi menjëherë dhe botohet në Fletoren Zyrtare.

**MINISTËR I BUJQËSISË DHE ZHVILLIMIT RURAL**



## Shtojca nr.1

## Regjistri i shkeljeve të rënda në peshkim

[illegible]

## Shtojca 2

Kodet për shkeljet e rënda në peshkim

| Kodi | Shkeljet e Rënda                                                                                                                                                                                                                                                                                                                                                                                                                                             |
|------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| A1   | Ka penguar aktivitetin e inspektorëve në zbatim të detyrave të tyre të kontrollit për zbatimin e masave mbrojtëse dhe menaxhuese në fuqi ose të vëzhguesve në funksionet e vëzhgimit të zbatimit të rregullave kombëtare në fuqi (shkronja “g”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                              |
| A2   | Ka fshehur, prishur ose zhdukur elemente të provës në lidhje me një hetim; (shkronja “g”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                                                    |
| B1   | Ka peshkuar pa leje apo pa autorizim të vlefshëm; (shkronja “a”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                                                                             |
| B2   | Ka falsifikuar apo fshehur markimin, identifikimin ose matikulimin e saj; (shkronja “f”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                                                     |
| C1   | Ka përdorur mjete peshkimi jo të autorizuar ose në kundërshtim me legjislacionin në fuqi; (shkronja “ë”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                                     |
| C2   | Ka peshkuar në mënyrë të drejtpërdrejtë një popullatë për të cilën peshkimi është i ndaluar ose pezulluar (shkronja “e”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                     |
| C3   | Ka peshkuar në një zonë të ndaluar, gjatë një periudhe kohore në të cilën ndalohet peshkimi me aktet përkatëse ligjore dhe nënligjore, ose ka peshkuar në një zonë të ndaluar, pa pasur një kuotë për këtë peshkim, ka peshkuar në një zonë të ndaluar kur ka mbaruar kuotën, ose ka peshkuar në një thellësi të ndaluar në zonën e ndaluar (shkronjat “c”, “ç”, “d”, “dh”, të pikës 1, të nenit 117, të Ligjit Nr. 64/2012, “Për peshkimin”, të ndryshuar). |
| C4   | Ka imbarkuar, transborduar ose zbarkuar peshq me madhësi më të vogël se madhësia e përcaktuar në aktet përkatëse ligjore dhe nënligjore në fuqi (shkronja “h”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                               |
| C5   | Ka kryer transbordime ose ka marrë pjesë në veprimtari të peshkimit të përbashkët me mjete lundruese të identifikuara si mjete që zhvillojnë aktivitet PPP, në mënyrë të veçantë atyre të përfshira në listën e anijeve PPP kombëtare ose të një organizate rajonale të menaxhimit të peshkimit ose i ka dhënë ndihmë ose furnizuar këto anije (shkronjat “i”, “j”, “k”, të pikës 1, të nenit 117, të Ligjit Nr. 64/2012, “Për peshkimin”, të ndryshuar).    |
| D1   | Nuk ka respektuar detyrimet e lidhura me regjistrimin dhe deklarimin e të dhënave për zëniet ose të dhënave të lidhura me to, përfshirë këtu dhe të dhënat që transmetohen nëpërmjet satelitit ose lajmërimit paraprak; (shkronja “b” e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                        |
| E1   | Ka përdorur një mjet lundrues që është pa kombësi, sipas kushteve të përcaktuara në të drejtën ndërkombëtare (shkronja “ll”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                 |
| F1   | Ka përdorur një mjet lundrues që është pa kombësi, sipas kushteve të përcaktuara në të drejtën ndërkombëtare (shkronja “ll”, e pikës 1, të nenit 117, të Ligjit Nr. 64/2012, “Për peshkimin”, të ndryshuar).                                                                                                                                                                                                                                                 |